

欽定剿平粵匪方略

欽定剿平粵匪方略卷一百一 甲寅年

閏七月初一日 戊辰 楊需奏言查北境之要西則

荊州東則德安中則襄陽安陸西取漢川東取
黃陂中由漢水直下北境之門戶鞏固戰與守
方有把握 臣前調雙保帶兵由潛江赴安陸合
剿其時尙不知有飭由沔陽直擣漢陽之舉及
得官文來咨知改調福忻帶兵前往現接都司

劉富成報於七月十三日行抵距安陸府城十里之蕭家店賊於城外紮有營盤次日與代辦安陸府事方卓然等分東西兩路夾擊殺賊五六百名是夜分遣守備石清吉等帶兵潛赴東門外樹林埋伏劉富成帶兵直薄賊壘鼓譟進攻賊衆驚擾我兵乘亂進擊立毀賊營賊衆大潰城中賊亦驚惶開小東門逃竄多爲伏兵截

殺擒斬千餘名劉富成由東門入城搜捕藏匪
悉皆駢斬當令劉富成探明賊窟何處速行追
剿並飭京山隨州棗陽各處一律堵截一面照
會雙保若尙未起程卽由潛江就近收復天門
由天門進取漢川福圻到安陸卽可由鍾祥取
道漢川爲雙保後應同知銜張于銘亦經官文
派赴安陸並可隨同前進知縣吳振鏞守備黃

鷗程帶勇由朱河前赴沔陽夾攻漢陽守備鍾
埈管帶練丁由沔陽直達漢陽此爲西路之師
東路則派知縣李殿華喬綏福參將花連布督
帶兵勇由孝感進攻黃陂台湧佈克慎帶陝西
綠營官兵由雙廟前進伊勒當阿帶滿營兵桂
明帶陝西兵駐紮楊店以爲後勁惟黃陂漢川
一帶船爲賊擄兵不能渡改由雙廟前進襄樊

一帶尙有民船已飭趕緊雇覓飛催楊昌泗等
揀帶精銳二千令於襄陽乘船由漢水順流擊
水路之賊而固襄陽之腹心兼爲東西兩路之
策應其餘兵弁催令來營爲分剿麻城黃岡及
分防長江埠瓠子潭及留守德安之用此籌畫
三路之大略也臣一俟船隻稍集卽帶德安現
駐之兵進紮楊店催督水陸征兵會合進剿奏

八

上命軍機大臣傳諭楊需曰所籌三路進剿機宜頗爲
詳晰其西取漢川東取黃陂兩路兵勇已不爲單安
陸又經收復可無後顧之慮亟應迅速督兵前進不
可再事耽延魁玉楊昌泗兵勇昨據官文等奏報已
挑選二千名飭令統帶前往監利防堵楊需旣藉此
項兵勇爲東西兩軍策應現已諭官文等飭令由監

利折赴襄陽從漢水直下著楊需一面飛速催提一面嚴飭襄陽府縣多備船隻迎候毋許稍涉遲誤昨據塔齊布曾國藩等奏報岳州克復以後疊獲勝仗湖南水陸各軍行至城陵磯以下已諭令速行東下與該署督爲三面夾擊之計並著楊需將如何會剿之處妥速咨商

上又命軍機大臣傳諭官文曰據楊需奏擬派楊昌泗

等揀帶精兵二千由襄陽乘船順流下擊爲東西兩路策應此次湖北省城赴荆兵勇共有六千餘名荆州兵力已不爲單自無須盡行截留著官文飭令魁玉楊昌泗等按照楊需所咨迅速帶兵前往無稍延誤其應行派留監利防剿兵勇仍著該將軍妥籌辦理隨時奏報

同日袁甲三奏言查逆匪南北奔竄東路以臨

淮爲最要西路以正陽爲最要如由霍山攻撲
六安則正陽自當添兵嚴防惟霍山已於本月
初九日收復六安一帶並無賊蹤而東路含山
被擾已失復得該逆揚言去而復來該處與巢
縣毗連一經勾結不惟巢縣攻剿難期得手卽
廬州亦倍形喫重且金陵鎮江逆賊疊被水師
擊敗勢甚窮蹙其北竄亦須豫防以現在情形

而論臨淮更重於正陽都司玉崑帶兵四百名
已經和春調赴正陽合以劉玉豹原帶之兵足
資守禦臣跨淮而守現帶兵勇除派赴各處勦
匪外存營不及兩千原派防守關山之勇經福
濟陸續遣散咨臣派兵接守查中關卽古清流
關右二十里爲馬鞍山左二十餘里爲龍井口
三關並守非二三千人不可現在時勢旣不能

分臨淮兵勇盡守關山又不能於現有兵勇之外另添勁旅琦善於浦口派有重兵請

飭將浦口防兵與江六民勇聯爲一氣共圖保衛使該

逆不敢北窺防剿更易得力臣復飭知府郭志

融由鳳陽至定遠滁州及附近之來安全椒等處整頓團練直接江浦六合以壯聲威而備接應奏入

上命軍機大臣傳諭袁甲三曰據袁甲三奏霍山業已收復六安並無賊蹤現在臨淮更重於正陽其關山防勇經福濟遣散後又須派兵接守大致總在兵力軍薄不能分赴正陽所奏尙屬實在情形惟六安霍山等處如果全無賊蹤則西路固覺稍鬆此時湖北黃州麻城一帶全被賊踞英霍之賊儻亦如含山一路逆匪去而復來兩路仍形並重前所以令該副都

御史與秦定三分紮臨淮正陽者原爲東西並扼本
無畸重畸輕今秦定三旣專力舒城是西路之防已
較東路稍弱袁甲三亦當妥籌兼顧互爲聲援不可
因正陽距廬較近稍存議卸之見至所稱近守關山
尤須遠防浦口所籌尙是浦口防兵及江浦六合民
勇疊據琦善奏報殺賊毀船尙俱得力本日復諭知
琦善令其加意嚴防袁甲三仍應於臨淮以南關山

左右設法嚴扼清流古稱險要扼守尙非難事未可專倚浦口爲屏障遂置險要於不顧也

上又命軍機大臣傳諭琦善曰琦善前奏紅單師船入江接仗以後迄今已及兩旬未據續行奏報懸念殊深此項舟師經琦善提撥陳國泰所統一起扼駐瓜州邇上復經向榮分提二十五隻駛赴上游進扼當塗蕪湖以便往來勦洗其儀徵上游一帶並有陳世

忠葉常春艇局各船節節攔截沿江上下有此布置
若能會合聯絡勦辦自必得手但江面賊船一經被
勦窮蹙勢必乘虛奔突所有北岸江浦六合各屬均
不可不加意嚴防浦口爲南北咽喉尤當衝要琦善
派防之總兵武慶節經斬獲逆匪燒燬賊船於一切
堵剿機宜尙屬得力當此江路攻剿喫緊之際尤須
妥籌堵禦不得稍有疏虞卽著琦善嚴飭該總兵一

面督令弁兵扼要截勦一面會集附近團練民勇協力保衛毋令賊蹤闖入至關山一路應於何處協同防守卽飭武慶就近知照袁甲三妥籌兼顧瓜州近日賊情及水師如何接仗該大臣務卽督飭水路各軍迅速進勦仍隨時知照向榮會商夾擊

同日官文奏言臣接奉七月十五日

諭旨遵卽派員前赴沙津將前任湖北巡撫青麐調至

郡城公所宣讀

諭旨卽行正法並飭知府祿勳將湖北巡撫關防湖北
學政印信暫存道庫由臣委員送交撫臣楊需
祇領奏入報

聞

初二日己巳勝保奏言臣商同德勒克色楞善祿
於二十七日丑初出隊進襲高唐逆匪善祿等

各帶兵勇分攻四門詎該逆早有準備兵勇等
方逼近城根豎梯爬城該逆齊聲吶喊木石交
加兵勇等手執擋牌奮力向前隨將噴筒火彈
望空拋打逆衆隱身垛內拌死抵禦兵勇攻撲
屢傷屢進欲撲上者數次天光漸曙槍隊兵勇
對定垛口開槍復於西北城角射進火箭將該
逆帳房延燒該逆於敵樓凸出處左右兩邊施

放槍礮從旁橫擊密如雨下兵勇暫伏城根臣
令將弁開放大礮擊中望樓燃燒藥簍登時火
起望樓傾倒並燒帳房七八架逆眾燒斃壓斃
甚多兵勇乘勢上攻該逆復將西南守城逆匪
抽赴東北一面悉力拒守兵勇受傷甚多其城
南一面臣德勒克色楞親督各勇逼近城關拔
其角柵施放火箭噴筒焚燒城樓擊斃賊匪西

面亦抵城樹梯皆以兵勇受傷未能得手祇得
收隊暫養兵力查高唐城中該逆連脅從不過
一千數百人自五月圍勦以來業經殲除十之
五六擬俟天氣稍霽誓必克復州城殄茲窮寇
奏入

上命軍機大臣傳諭勝保崇恩曰此次攻勦高唐州城
兵勇尙屬奮勉惟逆匪先有準備以致未能克復失

此機會殊覺可惜該逆僅千餘人我兵屢次勦洗業經殲除十之五六若我兵四面同時進攻使該逆不能互相救應必可搗虛攻入據稱賊於危急時尙能將西南守城之賊抽赴東北抗拒可見我軍未能悉力合圍該大臣等圍剿已兩月有餘若不知奮勉日事遷延以數百敗竄之匪牽掣全軍糜餉老師自問當得何罪

同日官文貴陞奏言前因安陸府城二次被賊
占踞當派總兵福忻等帶領兵勇馳往攻剿茲
據稟稱安陸賊匪已過襄河占住石牌鎮市經
署守備陳德新於七月十四日帶兵出隊行至
薛家沖派外委陳源濟等同該處義勇由下大
路繞至河岸堵擊該署守備帶領把總徐步雲
等及團勇由上大路直搗賊巢當殺斃賊首毛

士植蕭啞叭並匪衆數十名其自來紫坊地方
下河之賊經陳源濟等兵勇槍礮齊施落水淹
斃者百餘名又有一股退回石牌兵勇跟追圍
剿燒斃賊首劉八蕭毛並賊衆多名詎該匪逃
回安陸糾約賊衆千餘人於十六日蠶擁而來
陳德新親帶兵勇直撲賊隊射斃長髮賊僞西
府將軍陳忠賊匪潰散因兵力已疲收隊回營

又據代辦安陸府事方卓然等稟稱京山土匪孔招藻等勾結天門粵匪於六月二十八日突至郡城方卓然當經督縣帶勇迎敵因衆寡不敵卽退至利河口商同千總武天秩等招集精壯於七月初九日親率至城殺賊四百餘名初八初十等日安襄鄖荆道羅遵殿派千總賽國勝等帶兵到利河口會同前進十四日辰刻賊

匪千餘名來撲營盤當經方卓然督飭兵勇在河北岸出隊適荊州派張于銘帶勇由龔家集前來聲勢益壯兵勇奮力過河斬殺甚多又署督臣楊需派遊擊劉富成帶同京山縣派來巡檢褚鑣到梅子嶺殺賊二百餘名方卓然等商定於十五日會集各帶官兵由西路進攻劉富成由東路進攻賊被我兵攻打分路逃竄劉富

成卽從東路追殺當先入城收復安陸方卓然
由水路追趕於十六日進城安撫百姓並據羅
遵殿補稟京山縣先於五月初四日被土匪孔
招灤勾結逆賊竄入城內並往孫家橋一帶搶
擾該縣杜嘉善督帶兵勇進剿縣丞姚拱辰把
總劉春耀同時陣亡該道府派撥壯勇會同該
縣於五月二十日分路進兵該逆聞風出城東

聞

竄該縣隨將兵勇駐紮城內前赴各鄉搜捕餘
匪現在京山境內漸次肅清臣等現飭令福忻
張于銘乘此兵威會合署松潘鎮雙保統帶漢
屯官兵進攻天門縣卽由仙桃鎮蔡店直抵漢
陽聽候署督臣調遣奏入報

初三日庚午駱秉章塔齊布曾國藩奏言臣曾國

藩偕鎮臣陳輝龍於十五日抵岳時賊雖屢敗
尙盤踞城陵磯下游一帶又將漢口賊舟數千
傾巢上犯連檣數十里陳輝龍卽欲親督廣東
水師出隊進剿臣囑以下游水急進易退難如
遇南風不必開仗且沿江港汊慮有埋伏獲勝
後仍勿窮追十六日陳輝龍自坐拖罟督率所
部前行褚汝航夏鑾分坐戰船繼進李孟羣尙

未到岳其前隊廣勇先到者亦隨陳輝龍會剿
左營彭玉麟右營楊載福均酌撥長龍三板藉
作聲援時風色尙覺平靜行至城陵磯正遇該
匪出隊上犯該鎮道等排陣合攻槍礮齊發轟
斃賊匪多名燒燬賊船數隻賊卽下竄遊擊沙
鎮邦礮船乘勝跟追陳輝龍見風勢愈大卽插
旗收隊復恐沙鎮邦頭船有失督催施畧趕往

救護奈船身重大膠淺於激流旋渦中該逆見
拖罔膠淺卽時蠶擁而來湖港伏船亦出水師
各船奔往救護又被風橫吹而下互相擁擠槍
礮難施當被賊船擁近兵勇陷入重圍不能進
退被賊戕斃多名陳輝龍沙鎮邦均卽陣亡褚
汝航馳往拌救手刃數賊與夏鑾均被重創落
水殉難廣東署千總何若澧廣西帶勇候選府

經歷唐礫一同遇害計陳輝龍一營船礫盡失
褚汝航夏鑾二營失去快蟹四隻三板六隻李
孟羣一營失去快蟹四隻波山艇一隻長龍二
隻三板四隻惟彭玉麟楊載福二營獨全十七
日收集散亡點存礫械一面飛催省城所造三
板等船以資添補十八日臣塔齊布親督陸營
出隊適逆匪三千餘人由城陵磯舍舟登岸思

欲踞險紮營並分三股來撲我軍亦分三路迎
剿臣塔齊布匹馬當先兵勇奮力猛進陣斬悍
賊十餘名截殺四百餘名該逆見中路已潰猶
敢佯敗以圖合抄官兵愈殺愈奮又斃賊匪三
百餘名賊始敗走搶舟逃竄我軍截殺直追至
擂鼓臺地方計共殲賊八百餘名落水死者無
數查山東登州鎮總兵陳輝龍自到湖南以來

造船製械事事躬親此次雖乘勝輕進而忠勇奮發大節克全與同時陣亡各員一併懇

恩賜卹其陸路戰勝出力各員弁懇請

恩施以昭激勸臣國藩未能極力阻止以致挫失應請

將臣交部嚴加議處現在水路關鍵以城陵磯荆河腦爲扼要之區如能防守謹嚴則西可塞由荆入蜀之門南可截由湖入湘之路惟荆河

以上賊船游弋水師新挫上下勢難兼顧臣等
惟有扼守要隘先清上游以期速殄逆氛奏入

上命軍機大臣傳諭駱秉章塔齊布曾國藩曰我兵克
復岳州水師疊獲勝仗方冀乘勢東下直擣武漢賊
巢該提督等雖經屢勝仍當於銳進之中力圖萬全
之策乃因輕進失利致鎮道陣亡失去船礮甚多雖
塔齊布陸路獲勝究屬得不償失曾國藩係在水路

督戰於陳輝龍出隊時不能詳慎調度可見水上一
軍毫無節制卽治以貽誤之罪亦復何辭惟曾國藩
前經革職此時亦不必交部嚴議仍責令督飭水師
將弁奮力攻剿斷不可因一挫之後觀望不前陳輝
龍現已陣亡所有師船必須派員統帶李孟羣丁憂
現在留於軍營卽補遊擊楊載福屢次打仗出力卽
可派該二員管帶各船省城所造三板等船著略乘

章迅速催赴岳州毋稍延緩城陵磯荆河腦旣爲水
陸扼要之區亟應嚴密防守杜其紛竄之路塔齊布
仍督飭將弁兵勇乘勝進剿以期水陸夾攻並隨時
知照官文楊需一體截剿

上又命軍機大臣傳諭葉名琛柏貴曰湖南水師屢獲
勝仗於七月初一日收復岳州賊匪仍盤踞城陵磯
又調回漢口賊船數千上犯十六日總兵陳輝龍遊

擊沙鎮邦署千總何若澧等均因拖畧膠淺同時陣亡現在武昌尙未克復亟須舟師下駛會剿統帶乏員甚關緊要著葉名琛等卽於水師揀選得力鎮將二三員飭令趕赴曾國藩水營聽候調遣並將續購洋礮若干位配齊架具迅派委員一併解往備用

上諭內閣曰此次陣亡之山東登州鎮總兵陳輝龍奮勇殺賊因船膠淺以致捐軀殊堪憫惜著交部照例

議卹道員運使銜褚汝航保升同知運同銜夏鑾屢
次督戰疊獲勝仗茲以奮勇殞命均著各照升銜議
卹遊擊沙鎮邦千總何若澧府經歷唐礫均著照例
議卹其陸路出力之守備童添雲著免補守備以都
司補用並賞換花翎把總周岐山著免補千總把總
以守備補用並賞換花翎外委黃明魁著免補外委
把總以千總拔補其餘出力弁兵仍著該撫等覈實

酌保

曾國藩又奏言臣國藩前調廣西平樂府知府
李孟羣招募廣西水勇一千名來楚協剿已於
六月初六日督勇到省其時適聞武昌再陷該
員之父李卿穀方署湖北臬司卽知其萬無生
理該員忠憤鬱結晝夜趕辦船礮爲報讐殄逆
之舉臣國藩於七月初六日起碇該員卽於初

八日成行舟次萬石湖據逃出家丁具述該署
臬司殉難情形該員始得發喪成服十六日行
抵岳州赴臣行營將其父死事情形及父妾高
氏隨同殉難各節稟請

賜卹該員並稱例應丁憂回籍但武昌一日不復父骨
一日難收惟當寢苫枕戈隨同大軍進剿以期
奔喪收骨返葬故里懇將前營統領官另行遴

委俾得墨經從戎竭誠自效等語應請

旨飭下該員隨營督勇其前營弁勇仍令從權統領以
專責成奏入

上諭內閣曰前署湖北按察使督糧道李卿穀帶兵守
城備極勞瘁追賊陷武昌該道投池盡節洵不失城
亡與亡之義其妾高氏亦隨同殉難殊堪憫惻李卿
穀著加恩照道員例從優議卹伊子廣西平樂府知

府李孟羣現在丁憂著准其仍留軍營帶勇勦賊

初五日

壬申

琦善奏言查瓜州逆匪阻水自固經

官軍屢次進勦堅匿不出艇師各船之上駛者
皆在六合儀徵江面駐泊吳全美所帶之紅單
船二十五隻屢經向榮催提已與拖罾船駛往
金陵惟有陳國泰所帶之紅單船二十五隻駐
泊瓜州上游之土橋距瓜州較近奈船身笨重

非得西風不能駛下賊知其船重難行遂於初
八日潛來夜劫我船開礮連擊該賊船亦開礮
攻拒直至夜分賊划始退十五日瓜州賊匪與
鎮江賊匪共駕划船五十餘隻乘曉攻襲直撲
陳國泰坐船陳國泰督放大礮擊沈匪船三隻
復經各船開礮合擊焚燒匪船一隻擊沈一隻
該匪紛紛落水旋即退去臣以陸路旣阻於積

水大舟又困於無風豈容不求變通坐淹時日
現與水師鎮將議添多槳快艇數隻分駕礮位
又恐修造船隻曠日持久買船購料經費無出
因揀厯次所獲賊船之輕便者雇覓工匠修改
如式計旬日之內即可陸續工竣現據拏獲奸
細供稱瓜州鎮江之賊因金陵隔絕頗覺勢孤
擬糾兩地匪黨分爲兩股由水陸繞道衝過揚

州上竄清淮等語臣已密飭水師嚴扼下游焦
山南北要隘並令陸路各營分段嚴加堵截一
面設法進攻迅圖克復

琦善又奏言查艇師各船宜先併力攻克瓜州
然後計取鎮江席捲而上節節進剿方爲得勢
前准向榮移咨亦謂防賊北竄必以斷賊援應
瓜州爲先及將紅單船分提向榮又以上游喫

緊議欲多調艇師上剿第思此時和州以上賊舟往來如織其喫緊不獨金陵爲然若不熟審事機而急欲溯流直上僥倖嘗試以有限之舟師敵方張之巨寇萬一銳氣稍挫恐難復振且查艇師各船現在焦山者多係壞艦孱兵不足以資攻剿並非皆堪駕駛其現駐六合儀徵者爲數無多不敷分撥而下游瓜鎮賊船人數不

少儻竟鋌而走險直撲焦山下游北可以竄清
淮南可以達蘇杭是下游喫緊情形實與上游
無異臣前准向榮咨商於分提紅單船外又經
臣撥給拖罾船六隻派總兵葉常春統帶上駛
協同吳全美進剿就船數而論已不爲少南岸
防剿儘可敷用其北岸之浦口地方一年以來
全賴武慶防堵嚴密未容猖獗故浦口一軍儼

然爲江北之重鎮至瓜州賊匪防守愈嚴每日
於江干運石砌城與鎮江同一情形疊據奸細
難民俱稱瓜州之賊多於鎮江並無陸續渡江
歸併鎮城之事向榮所奏自是誤採流言臣以
爲必力扼下游然後可逆制上游必保護北岸
然後可徐圖南岸若不顧形勢凌躡以施誠恐
上游未能制而下游先已空虛南岸不可圖而

北岸並致決裂祇以事關大計籌畫不敢苟同
奏入

上命軍機大臣傳諭琦善向榮曰粵省紅單船旣形笨
重自應多造適用船隻以期輕捷琦善旣稱旬日之
內可以竣工則北岸水陸攻具均已漸次齊備正可
乘勢力攻瓜州斷絕鎮江賊船聯絡之路向榮前奏
瓜州之賊有欲全竄鎮江之說本日琦善奏奸細供

稱瓜鎮逆匪議分水陸上竄清淮大約賊情詭譎本無一定趨向瓜州攻勦緊急則歸併鎮江亦在意中焦山下游堵截嚴密則上竄清淮亦宜防範琦善向榮總當各就所有水陸兵勇或分或合悉力籌辦若處處專恃設防而金陵鎮江瓜州三處負隅如故於大局仍無裨益著琦善於礮船造齊後卽行設法力攻瓜州一面嚴飭余萬清進攻鎮江果能同時並舉

賊衆雖多亦將應接不暇豈能肆其勾結奸謀至向榮所調吳全美紅單船並琦善續派上駛之拖罾船爲數本不甚多以之防勦上游尙可扼守若竟恃有限之舟師僥倖嘗試冒險深入設有蹉跌則上游旣無機會可乘下游亦無以資控制著向榮卽將現在調到各船擇要布置相機攻勦總期嚴遏南岸賊船旁竄之路使金陵之賊不能援救瓜州聯絡鎮江則

下游勦辦自易得手毋庸多調船隻專赴上游一俟
瓜鎮克復下游師船自能聯檣進勦船多勢壯攻擊
方能得力也琦善向榮但當不分畛域合力妥籌毋
得各執己見致誤事機

初六日酉癸王慶雲奏言臣聞行軍首重芻糧從

未有專恃銀錢以充兵食者謹按舊例征兵每
名月支鹽菜銀九錢日支口糧米八合三勺或

麪一斤近例征兵每名日支鹽菜口糧銀一錢五分不支粟米計每兵月支銀四兩五錢馬乾駝折在外凡以優給兵丁令其自行買食殊不知糧臺有銀無糧則事有可危費亦過甚今軍興三載有餘幸賴各省比歲有秋大軍所至隨地皆堪餬口萬一水旱偏災糧臺無糧銀錢不得充飢枵腹之兵何所不至今征兵之餉較舊

例加至五倍宜乎充然有餘然行營所至人人
買食糗餌粉餐昂貴數倍今之兵丁百錢不敵
當時三二十錢之用餉不節而兵猶苦飢皆自
不支粟米始臣以爲兵丁需餉固殷要必先問
其飢飽飢則易至離心飽則無可藉口惟有一
面籌餉一面籌糧先使兵不苦飢乃可議及攻

勦擬請

飭下部臣檢查嘉慶初年軍需成案將每兵月支鹽菜
日支口糧之數斟酌妥議行令廬州及各路糧
臺按照兵數先備一月之糧倣照舊例銀糧兼
支計每兵月支口糧二斗五升有千兵者儲糧
二百五十石有萬兵者儲糧二千五百石兵丁
知有一月之糧不致人人懷自危之心雖軍營
不能不用銀錢而米麪旣係實支無須買食卽

集賢堂卷之二
三
復鹽菜九錢之舊於兵丁並無所苦而經費所
省良多矣奏入

上諭曰所奏甚好足見謀國之誠其有未備及各就各
省簡便之處著軍機大臣會同戶部速議具奏

同日陳啟邁奏言九江地處江濱界連楚皖經
臣派臬司惲光宸前往通遠驛等處會同總兵
羅玉斌督率兵勇扼要紮營據羅玉斌等咨報

現到賊船二千餘隻泊龍開河等處以潯城爲
巢穴並在西門外張官巷砌築土城安設大礮
都昌地方緊靠鄱湖復有賊船數百隻乘風駛
入臣卽撥勇一千餘名令已革知縣劉希洛管
帶馳往羅玉斌軍營助勦並派知府元善統帶
戰船水勇往援都昌茲據元善稟稱都昌團練
鄉勇與賊接仗互有殺傷該逆偵知官軍赴勦

卽時騰去縣城得保無虞鄱陽境內尙未被擾
臣查九江賊艇多至三千有奇而都昌退出之
船恐復歸併潯中省城爲根本重地防禦不容
稍懈現飛催羅玉斌嚴督兵勇相機進剿臣督
同司道激勵兵勇在近省要隘紮營以杜窺伺
奏入

上命軍機大臣傳諭陳啟邁曰逆匪竄踞九江郡城賊

艇多至二千有奇都昌退出之船亦難保不歸併九江爲窺伺省城之計然不嚴扼九江但知退守省垣殊非長策該撫前奏於南康府上下將新造戰船三十號小船百餘號配載水勇二千有餘擇要駐泊並備火攻舟筏復選陸路兵勇二千名分紮兩岸爲犄角之勢統計水陸兵勇約四千有餘其續造戰船二十隻及廣東洋礮諒已齊備該撫現又派勇一千餘

名馳往助勦兵力已不爲單此時自應嚴飭羅玉斌
及候補知府元善統帶兵勇相機進勦破九江之賊
巢卽可固省垣之門戶卽使郡城未能迅速克復而
湖口姑塘皆係扼要之區亦當撥兵據險牽制賊勢
現由武甯一帶調回官兵壯勇並可酌量派赴下游
要隘以助防勦若能扼住潯陽不特該省之藩籬可
固卽長江全局亦可藉作聲勢曾國藩克復岳州旋

因輕進失利此時湖南舟師能否下駛尙未可知該撫務當統籌熟計不得藉口兵單置九江於不顧

陳啟邁又奏言據知府史致諤等稟報武甯緊鄰湖北迤北橫路地方固係賊藪而西路石洋洞亦屬匪巢隨派已革參將德保等管帶兵勇前往攻剿六月二十九日殲斃賊匪多名生擒僞百總徐時鉅等五名賊匪敗竄入洞堅守不

出七月初七日我軍先將兵勇伏於要隘各處
聲稱拔營回縣誘賊出追賊果傾巢而出伏兵
四起堵其歸路我軍回擊當殺賊二百餘名生
擒長髮賊三十名餘匪逃散出境遂將石洋洞
巢穴焚燬遊擊常海等先於七月初二日會督
知縣馬永熾等統領兵勇前往橫路一帶進剿
現在潯中警報頻聞省垣兵單已飛飭兵勇撤

聞

回省垣以備不虞奏入報

初七日

甲戌

和春福濟奏言廬城逆匪疊被斬擒

亟應趕緊進取七月十八日督領各營官兵分赴各門四面圍攻北門突出二三千人分股來迎經吉順等分途擊勦立斃賊匪一二百名時值東北風大作我軍連放火箭燒燬城內房屋

及城上更棚該逆敗走入巢我軍追殺斃匪四
五百名奪獲鳥槍刀矛一百餘件是夜我兵於
得勝門城根賊巢外潛伏各勇拔樁而進同時
拋擲火罐當焚賊巢兩處其越牆而出者跌落
濠中均被竹籤洞胸貫腹訊據獲賊供稱兩處
巢穴有僞將軍黃姓在內共計賊一千餘人大
半均被燒死三更火息旋即收隊我軍並無傷

亡二十六日四面進剿得勝門突出賊匪二千
餘人當飭吉順等迎擊該匪拌死抗拒適常清
等趕到會剿三面夾擊賊勢大亂敗逃入城斃
賊六七百名俟再設法攻剿力圖克復奏入

上諭曰現在廬城之賊爲數無多果能四面齊攻俾應
接不暇自可得手和春久歷戎行因何計不出此屢
次觀汝等奏報未嘗不分路進攻然總未克復皆緣

諸將勇怯不一未免先存觀望及至臨收隊時必趕至汝陣前以掩其畏葸汝則曰進攻某門未能得手同時趕到試思汝又未見其直薄城下焉能必其不能得手號令不嚴故曠持若是也

和春福濟又奏言舒城逆匪於橫嶺築壘勢欲負嵎經秦定三節次痛勦勢已窮蹙七月十二日秦定三督同郝光甲等帶兵分撲賊巢該逆

越牆奔逃我軍乘勢擁進立將賊營十四座全
行燒燬復追殺數里始行收隊約斃賊匪千有
餘名奪獲槍礮軍械什物不計其數該逆現在
城外紮營並分股於南鄉宋家灣占踞音德布
於十三日到舒擬卽會商移營調集鄉團設法
進剿並以宋家灣地連六安已派四川兵勇八
百名駐守州城以資捍禦奏入報

初八日乙亥僧格林沁西凌阿托明阿奏言現在

河東水勢漸消套隄以內間有涸出沙灘之處
初四日夜該逆潛撲明慶舒保營牆勢極兇猛
明慶等俟衆匪逼近濠邊槍箭齊施侍郎慶祺
開放大礮轟斃多名奪獲長梯攜牌旗幟甚多
餘匪踉蹌回巢我兵並未受傷逆匪屢撲屢挫

圖竄倍急自當趁其窮蹙設法攻勦以期迅奏
膚公再已革副都統明慶獲咎以來深知愧奮
此次截擊逆匪甚爲出力籲懇

恩施准予開復奏入得

旨明慶旣屢次出力著開復原官

初九日丙子向榮奏言查東壩爲蘇常門戶時防

賊船內竄吳全美紅單船二十五隻於七月十

二日至浦口江面屢催上駛無如經旬未遇順風仍泊原處查有各船隨帶之三板船小而易使密飭吳全美妥爲派撥並催浦口划船乘夜渡過夾江焚襲該逆水營臣另由陸路潛師接應兩次均有斬擒又恐紅單船少力薄函商琦善續撥拖罾船六隻前來助剿迄今未據報到二十三日副將福賡稟報有賊船七八百隻由

蕪湖關入內河已至高淳之小南湖勢將直犯
東壩查該處防兵僅一千四百餘名臣當抽撥
精銳兵勇二千人交署徐州鎮副將傅振邦率
同遊擊蕭知音等管帶立時啟行馳往截剿復
飛調鎮江官兵一千四百名由常州宜興以趨
東壩迎頭兜剿並咨督臣怡良撫臣吉爾杭阿
趕調上海兵勇二三千名守護蘇州省城仍相

機由無錫宜興前來會剿以防內竄並飛咨浙省一體防堵旋據探報該逆已竄越高淳至固城一帶距東壩祇十四五里福賡帶兵迎剿斬殺多人逆衆退於湖口二十四日匪船復乘風颺至撲近我營福賡督率廣東兵八百名上前奮擊斃匪百有餘人燒燬賊船二隻該逆愈集愈衆四面圍撲自卯至未我兵力不能支福賡

中蔽陣亡餘兵潰散聞信之下憤恨填膺隨派
翼長福興會同已革提督鄧紹良統帶兩廣兵
勇一千六百名星夜馳往督勦旋接傅振邦稟
稱該副將於二十五日進距東壩五里山梁該
逆萬餘蠡擁來拒我軍施放排槍立斃賊匪無
數忽由後湖抄出賊衆數千我軍分投迎勦無
不以一當十刀砍矛刺該逆紛紛倒地鏖戰許

久殺賊不下五六百人生擒新舊長髮賊五十
餘名賊目四名斬獲首級五十餘顆奪獲槍礮
旗械一百餘件餘逆四散避匿是夜卽進營毛
公鋪二十六日分兵二隊先由下壩出其不意
由後抄擊該逆驚潰回奔其上壩賊黨亦被我
兵前隊趕殺卽時擊沈五船餘皆開駛遠竄岸
上潰匪復經我兵兩路夾攻斬擒甚衆餘逆俱

同高瀆竄走我軍追殺十餘里而止探聞逆匪
尙在高瀆聚集築壘竈濠意圖久踞現一面責
成傅振邦趕緊追剿仍飛飭福興督率諸軍併
力追躡務將高瀆一帶肅清臣仍催趨紅單拖
罾各船一遇順風進赴蕪湖等處江面與陸兵
會合夾攻以期盡掃賊氛奏入報

同日官文貴陞奏言據雙保稟稱天門縣賊勢
鴟張當派署參將常德等帶兵會同潛江縣知
縣龔煥枝等合力進剿七月十八日行至渙新
河轟沈賊船三十餘隻斃賊六百餘人餘匪棄
船奔逃我兵過河追擊又斃賊三百餘人生擒
七十餘名隨將賊船燒燬二十一日行至天門
縣城外江家河地方突來賊匪四千餘名我兵

環施槍礮轟斃三百餘名二十二日督兵過河
擊斃賊匪無數適安襄鄖荆道羅遵殿派縣丞
袁政等帶練夾攻該鎮親督兵勇殺進城內生
擒逆首孔招汝及僞職多名梟示當將縣城收
復又據沔陽州知州蕭蔭恩稟稱距州城七十
里濱臨襄河之仙桃鎮爲大股逆匪久踞茲分
三路直撲內湖里云口一帶該牧分派官弁兵

勇兩路環抄自同營汎學官紳士等由中道攻
擊適由荆派往之知縣林天直等管帶練勇亦
至該處正值賊匪在里云口搭橋渡河我兵奮
擊當斃賊三百餘名餘匪逃過浮橋擁擠溺斃
無數生擒僞督軍孫桂元等八名正法七月十
五日至仙桃鎮地方搜殺賊匪四百餘人賊船
五十餘隻卽割纜開放岸上餘匪紛紛逃竄臣

等當飭該鎮等趁此聲威速行前進由楊需調撥攻取武昌惟大江賊匪屬集螺山一帶誠恐南岸攻急突竄北岸沔陽新隄等處土匪未淨雖前派李光榮帶勇協剿兵力尙單茲於青麀帶來荊州兵勇內挑選四千三百餘名卽飭魁玉楊昌泗管帶由監利前往螺山會同湖南官兵相機進剿直達武昌聽候兼署督臣楊需差

遣奏入

上命軍機大臣傳諭官文楊需曰據官文奏雙保等督帶兵勇克復天門縣城沔陽州知州蕭蔭恩等將該州所屬仙桃鎮賊巢攻破已飭該鎮等速行前進聽候楊需調遣卽著楊需催令迅速前進直取漢川與東路黃陂之師力圖夾擊毋任再延至楊需所籌中路之師現據官文奏螺山一帶賊船甚多儻南岸攻

勦緊急北岸礮勇千餘名尙形單弱魁玉楊昌泗已
飭由監利馳往螺山隨勦隨進再達武昌意在重防
荆岳交界此時湖南水師甫經挫衄螺山地方上通
荆郡下接鄂省若必令魁玉等折赴襄河誠恐程途
紆緩且難兼顧荊州果能與湖南兵勇沿南北兩岸
夾攻而下亦仍不失三路進攻原議著卽照官文所
請責令該革員等管帶兵勇與湖南水陸兵勇節節

進逼毋任南北接壤之處稍有賊蹤闌入楊需想已
於日內進紮楊店卽著迅督東西兩路官兵分道進
剿至青麋原帶兵勇除魁玉等現在帶赴螺山四千
三百名外其餘兵勇如楊需必須調赴襄河直入漢
水仍著揀派得力將弁徑往迎提管帶前進以資協
剿其克復天門及攻剿仙桃鎮出力之官紳兵勇著
官文會同楊需酌量保奏